

河
防
一
覽
(二)

河防一覽卷之八

奏疏

河漕潘李馴題

主事王元命校訂
副使曹時聘運同陳昌編次

恭報續議工程疏

臣潘李馴謹

題爲遵奉

明旨恭報續議工程以便查覈事據管理河道工部

郎中余毅中張譽王事陳瑛管河兵備水利營

田等道叅政龔大器游李勲副使張純僉事朱

東光史邦直會呈抄蒙總理河漕并漕撫衙門

憲牌仰職等即查各工內有與原議不同工程會同類總開呈以憑覆覈奏

聞依蒙隨將各工逐一查勘除兩河分合及應築應塞工程俱與原議無異又隄工各高闊丈尺各相度地形增減不等候通完之日冊報外所有隄岸閘壩勢當小更難拘原議者委應裁酌用圖經久以淮北言之如南岸遙隄原議自靈璧縣張字舖起至邳州果字舖止共長九十八里其張字舖以上原因河岸甚高故止議將玄黃

二舖掃灣處所展築月隄長八百五十丈今續
勘得徐州三山頭起至靈璧縣張字舖共五十
餘里一帶河岸雖高然先年遇有異常泛漲亦
往往漫決若止展築玄黃二舖月隄尚有可虞
相應一併接築遙隄計長九千餘丈庶成全隄
無復遺慮其玄黃二舖止築順水壩以遏水勢
不必另行展築果字舖以下原因縷隄頗遠故
未議築遙隄續勘得果字舖至李字舖縷隄約
四里餘猶覺逼近仍應增築遙隄計長七百五

十丈北岸遙隄內邳州谷山并匙頭灣二處俱有水溝瀦畜積水合行疏泄今議冬建函洞一座以便泄水桃源縣古城起至季十二止計六十里內原議滾水壩三座已經建完今歲伏水漲溢之時甚賴其減泄之力但季太口至清河縣計五十餘里未議建壩恐水勢至此尚致漲溢勘得三義鎮地形原窪衆水所趨合增建滾水壩一座其長闊丈尺俱照前壩度分殺之路既多則衝漫之患可免此淮北工程所當續

者也以淮南言之原議修復清江等閘今勘得
通濟閘逼近淮河直受衝鬪勢甚涵湧且閘設
年久底椿朽爛加石太重不免坍塌相應改建
於甘羅城東堅實之地仍改濬河口斜向西南
使水勢紆迴不至直射庶便啓閉前閘既已改
建則新莊閘距此不及一里難容多船而關鎖
太促水勢湍急不易啓閉相應拆卸福興閘上
距通濟閘計二十里下距清江閘止五里遠近
懸絕且亦因年久圯壞難以加石今議改建於

壽州廠適中處所其清江一閘仍照原議修復
至於板閘地窪水平無庸啓閉止須照舊免行
增高又勘得原議修復五壩內信字壩逼近淮
城且係黃河掃灣先年久廢不用今已將禮智
二壩修復見在車盤船隻其仁義二壩原共一
口出船亦係黃河掃灣又與清江閘相鄰恐有
意外衝漫之患見今築隄在上以禦黃流不便
修復查得舊有天妃閘正與清河直對相應建
壩一座於本閘之裏則車盤尤便而船隻無阻

矣其興塩等處入海支河原因高堰未築黃浦
入淺等決未塞水勢浩蕩故踵襲節年舊議欲
加挑濬以洩積水近勘得高堰築完黃浦入淺
俱塞下流已乾無水可洩而海口之水反高於
內地若復挑濬則海水灌入既傷民田復損塩
利正在勘議間隨該巡塩御史姜璧躬親踏勘
題

請免濬復經司道會勘委應停止夫興塩等處既以
無水可洩免濬支河若寶應湖隄仍照原議於

三十里之內添建減水閘六座又恐分流太多
興塩難受况建閘初意祇因上流水溢恐致傷
隄今高堰旣築通濟閘外又經題

每年水漲之時築壩斷流則寶應湖水不甚盈溢
湖隄可保無虞不必多建減閘今議修復舊閘
二座創建一座通共四座庶運道民田俱有攸
賴其開挑興塩支河工費銀二萬五千八百七
十六兩原議於巡塩衙門動支運司銀兩仍聽
該衙門作正支銷此淮南工程所當續議者也

以上事宜皆因地損益隨時劑量期於有濟不敢執泥俱經會議僉同陸續呈請舉行訖今蒙行查理合類報轉

奏施行等因到臣案照先准工部咨爲奉

明旨陳愚見議治兩河經畧以圖永利事該臣等題議各項工程事宜本部覆題奉

聖旨這治河事宜旣經河漕諸臣會議停當依擬都准行着他們悉心着實興建永利各該經委分任人員如有玩愒推諉虛費財力者許不時拿問叅

治其未盡事宜及臨時事勢或與原議不合的也
着陸續奏聞務求有益應用錢糧你部裏便會戶
部上緊議來欽此備咨到臣俱經通行司道欽遵
興舉間續據郎中余毅中等議將各工增損事
宜節次會呈前來又經臣等親閱相同批允舉
行訖祇緣工程大體俱無更張止於節目微有
不同事涉煩瑣未敢屑屑瀆

奏茲當告成伊邇合行通查類報今據前因爲照
爾河大工延袤千里臣等荒度之初止詳於爾

河分合大勢而隄岸閘壩之遠近多寡委須臨
時再加斟酌仰荷我

皇上坐照萬里洞燭事機假臣以便宜之權開臣以
續

奏之路所據司道陸續議報前來在淮北則有徐
州三山頭起至張字舖加築遙隄五十餘里玄
黃二舖止建順水壩一道果字舖起至李字舖
加築遙隄四里餘谷山匙頭灣添建函洞二座
三義鎮添建滾水壩一座此皆原

題未載委應增益在淮南則有通濟福興二閘從
新改遷新莊逼近通濟閘勢難兩存板閘止宜
仍舊信字壩逼近黃河不便修復仁義壩改建
天妃閘以裏至于興塩等處入海支河因高堰
黃浦八淺隄成無水可洩自宜停止而寶應湖
隄減水閘止須修建四座此原備載委當更易
因時審勢隨地制宜臣等固不敢惜勞以貽一
簣之虧亦不敢妄舉以滋無益之費其應添錢
糧卽於原議河工銀內通融裁節濟用並無求

益加派之事除將各隄工高闊丈尺相度地形
增減不等通候查覈外相應

奏報謹具題

知奉

聖旨工部知道

查復舊規疏

臣潘季馴謹

題爲乞

恩查復舊規以利漕渠事臣等謬膺

簡昇肩厥鉅艱日夕兢兢惟恐一事未周有負

任使茲幸

廟堂主持諸臣効力導河防決之工駸駸然有涓
埃之驗矣但於淮安一帶閘河終有未安者臣
等初至地方目擊淮安西門外直至河口六十
里運渠高墊舟行地面昔日河岸今爲漕底而
閘水湍激糧運一艘非七八百人不能牽挽過
閘者臣竊恠之詢之地方俱云自開天妃閘後
專引黃水入閘且任其常流並無啓閉而高堰

決進之水又復鎖其下流以致沙淤日積萬曆
五年河渠堙塞隨濬隨淤不得已開朱家口引
清水灌之方得通舟臣等乃決意開復通濟閘
以引范家湖清流且

請修舉陳瑄故事嚴其啓閉隨該工部覆奉

欽依咨行遵照見由通濟閘引水濟舟河身亦覺漸
刷數年之間或可復故矣但沙淤可免而湍溜
如舊牽挽不易而啓閉甚艱且聞淮河暴發亦
有渾流臣等求其善處之術而未得也隨行據